

四庫全書

史部

欽定四庫全書

浙江通志卷二百七十八

藝文二十

詩 七言絕句

湖上莫歸

元趙孟頫

春陰柳絮不能飛
雨足蒲芽綠更肥
政恐前呵驚白鷺
獨騎款段遶湖歸

湖州

元戴表元

山從天目成羣出水傍太湖分港流行遍江南清麗地
人生只合住湖州

西興馬上

元戴表元

去時風雨客怱怱歸路霜晴水樹紅一抹淡山天上下
馬蹏新出浪花中

西湖行春

元黃庚

畫船無復沸笙歌湖水年年自碧波回首蘇公隄上柳
綠陰不似舊時多

臨平泊舟

元
黃 庚

客舟繫纜柳陰傍
湖影侵篷夜氣涼
萬頃波光搖月碎
一天風露藕花香

西湖絕句

元
薩都拉

湧金門外上湖船
狂客風流憶往年
十八女兒搖艇子
隔船笑擲買花錢

惜春曾向吳船宿
酒渴吳姬夜破橙
驀聽郎君呼小字
轉頭含笑背銀燈

待得郎君半醉時
笑將紈扇索題詩
小紅簾捲春波綠
渡水楊花落硯池

簫臺八景

元
李孝光

古帝南巡事已非
土階茅屋尚依依
夜深月底吹簫去
度得雲門一曲歸

雲門福地

蝙蝠翻雲似白鴉
石林玉氣亂晴霞
山中雞犬應相笑

溪上紅桃幾樹花

蓋竹洞天

雨洗天根雲洞幽
黑蛟飛電舞長湫
只應壯士思酣戰

組練相銜夜不收

雙瀑飛泉

山月崢嶸露映環石樓香冷白雲間玉簫吹裂階前竹

騎鶴仙人去不還

簫臺明月

風約疎鐘下杳冥天南曙月颭飛星駝鳴閭闔囂聲起

老鶴巢深夢未醒

白鶴晨鐘

蕭蕭清磬出雲遲月上空林日氣微重過紫芝山下路

壞橋燈火照人衣

紫芝晚磬

海月四更移塔去天風萬里劈松開煙銷日出無人到

獨自看雲山上來

東塔雲烟

山上行人如凍蠅
西崖日出澹青熒
太陰積雪草木縮

留得孤松長茯苓

西岑松雪

錢塘懷友

元黃清老

舟泊楓林一鴈聲
白蘋紅蓼共思君
月明江水多於海
雨後秋山碧似雲

九日登玉霄峯四首

元曹文晦

九日登山正自佳
松梯微露濕青鞵
重巖細菊斑斑出

一路題詩寄客懷

嶺頭回首是官塘
野樹青紅天雨霜
清氣著人吟不盡
玉霄峯頂過重陽

白雲如屋深復深
白雲之外松樹林
別峯線路入雲去
直恐西通天姥岑

洞門雲氣合玄黃
洞裏仙人白麝裳
見說金鐘飛去遠
不應雞犬不騰驤

九曲樵歌十首

并序
錄七

元
曹文晦

昔考亭朱子作武夷九曲樵歌余少小愛之誦甚習
近登桐柏嶺路盤回亦有九折因仿之賦桐柏九曲
樵歌固不敢較先賢之萬一亦效顰而忘其醜也

瓊闕峩峩接太清五雲洞口問長生欲知嶺上無窮景
聽取樵歌四五聲

一曲初過亂石磴兩山松柏翠重重下方樓閣天台觀
坐聽殘陽數杵鐘

三曲天開畫屏松風吹鬢不勝情山城石甃無蒼蘚

絕愛鏗然放杖聲

四曲峻嶒上石梯
烏巖千仞與雲齊
巖前風起藤花落
一個畫眉松上啼

五曲翻身看晚霞
平川歷歷見人家
桐溪水匯清溪曲
山似游龍水似蛇

七曲彎彎翠櫟林
風吹萬葉自清音
行人已在長松杪
回首原田似井深

九曲巖腰坐碧苔
吹簫人去有空臺
雲深不見來儀鳳

野鳥自啼花自開

過鑑湖二首

元 貢性之

歸思關心路轉遙
打頭風急滯蘭橈
夕陽江上秋無數
血點蜻蜓立碧苔

南風吹斷采蓮歌
越渚船開小似梭
却恐紅粧不成態
背人偷照鑑湖波

蘭亭

元 張天英

酒醒風雨濕衣巾
曲水荒涼幾莫春
檐外蕭蕭修竹在

相逢如見永和人

釣臺

并序

元
貢師泰

嚴陵釣臺詩古今作者甚多或高其隱或議其果二者皆不為無見故並存焉觀者應為一莞也

百戰關河血未乾漢家宗社要重安當時盡著羊裘去誰向雲臺畫裏看

桐江道中

元
吳師道

東風綠水動微波晚泊灘頭理釣蓑喚起江湖昔年夢

一帆寒雨聽漁歌

西興

元
朱德潤

八月海門天氣涼
潮頭如雪上錢塘
斜陽更比歸人急
又引輕帆入富陽

柯亭

元
黃鎮成

金碧樓臺宅梵王
柯亭無處問中郎
何當截取如椽幹
吹起崑丘紫鳳皇

臨安訪古六首

元
張昱

舊日婆留井未湮石關苔蘚上龍鱗而今率土皆臣妾

莫願皇天產異人

婆留井

峯頭石塢表功臣五百年前是佛身莫問蓬萊水清淺

野藤猶蔓劫餘春

功臣塢

錢王功業與天齊百里旌旗照此溪從此波中鋪錦後

至今光景淨無泥

錦溪

將軍官重執金吾不比秦朝列大夫王為錦衣歸故里

遂令老樹有稱呼

將軍樹

東山尚存環翠閣謝傳來遊經幾年可是舊曾攜妓到
粉香猶在畫欄邊

環翠閣

祥符額賜海會寺回首年來彈指過試問竹林橋下路
往還曾見幾東坡

淨土寺

吳興道中二首

元張雨

眠溪大樹不見日收鷺小兒兼釣魚南風相送玉河口
舟子飯時吾讀書

扁舟偶趁采樵風題扇書裙莫惱公何處人間無六月

碧瀾堂上雨聲中

三衢道中三首

元張雨

大溪中道放船流
船壓山光瀉碧油
三百里灘欹枕過
買魚醺酒下嚴州

東風惡劇雨飛花
被底春寒水漲沙
蘭茝溪香小回首
一峯晴雪是金華

界道飛流山翠重
杜鵑無語杜鵑紅
歸人一舸貪新水
渾墮丹青便面中

西湖竹枝詞

明 東宗葵

初三月子似彎弓
照見花開月月紅
月裏蟾蜍花上蝶
憐渠不到斷橋東

曉發秀州

明 徐 賁

路出雙湖烟樹東
舟行長是雨兼風
夢回重有離家恨
惆悵春寒此夜中

送張景則歸天台

明 徐 賁

浙江東去有名山路遠
天台鴈蕩間我未得遊
空悵望

是君鄉里喜君還

淳安櫂歌

明 汪廣洋

淳安縣前江水平
越女唱歌蘭葉青
山禽只管喚春雨
不道愁人不願聽

蘭溪櫂歌二首

明 汪廣洋

涼月如眉挂柳灣
越中山色鏡中看
蘭溪三月桃花雨
夜半鯉魚來上灘

野鳬晴蹋浪梯平
越上人家住近城
箬葉裏魚來換米

松舟一個似梭輕

題林處士觀梅圖

明 錢 宰

放鶴仙人不可招
斷河殘月夜聞簫
別來欲問真消息
花落西泠第二橋

西湖竹枝詞

明 丁 麟

湧金門外春水多
賣魚船子小於梭
三三兩兩唱歌去
驚起鴛鴦飛奈何

貞溪初夏四首

明 邵亨貞

雨後深林竹筍肥
渡頭風急柳花飛
柴門不掩綠陰靜
人在閒窗試苧衣

巡簷燕子掠晴絲
隔塢茶烟出院遲
草色入簾人不到
午風吹暖夢回時

棟花風起漾微波
野渡舟橫客自過
沙上兒童臨水立
戲將蘋葉飼新鶺鴒

小巷縑車霜繭熟
前村社鼓野人來
鵝鳩聲在樹陰裏
竹下柴扉晝不開

盤山道中

明林溫

盤山嶺頭春雨多天
台鴈蕩雲相摩
鷓鴣啼入竹林去
我行不得君奈何

杭州歌

明張以寧

西陵渡口潮水平
十五五放舟行
樓中燕子慣見客
不怕渡頭津鼓聲

過桐廬

明張以寧

江邊三月草淒淒
綠樹蒼烟望欲迷
細雨孤帆春睡起

青山兩岸畫眉啼

夏日憶西湖

明
于謙

湧金門外柳如烟
西子湖頭水拍天
玉腕羅裙雙蕩槳
鴛鴦飛近採蓮船

西湖夜宿

明
李進

蹇驢衝雪岸烏紗
夜醉西湖賣酒家
十六吳姬吹鳳管
捲簾燒燭看梅花

葛嶺懷古

明
陳雖

山上樓臺湖上船
平章醉後嬾朝天
羽書莫報樊城急
新得蛾眉正少年

載酒過湖

明 劉 英

寒食清明次第來
紫苞紅萼裹池臺
東風似與人商畧
最好花枝最後開

題許上舍家梅花

明 聶大年

西湖曾繫木蘭橈
湖上殘雲雪未消
報道南枝春信早
移船更近段家橋

桐溪

明李蕃

萬年禹鑿東連海
百折清流曲抱村
風浪不驚魚鳥盡
桐花開到邑侯門

南湖卽事

明周瑾

湖水空明靜不波
蕩舟人遠夕陽多
秋來無限相思意
欲採芙蓉奈晚何

春日湖上四首

明銍泰

浴鵠灣頭盪槳過
雨聲昨夜漲湖波
落梅天氣寒偏峭

未許春衣試薄羅

步逐東風踏軟沙
背人鷺鷥去斜斜
兩株紅杏踈籬外
知是湖村賣酒家

小鬟扶處醉瞢騰
落日寒生半臂綾
燕子不來春尚淺
湖陰留得未消冰

櫻桃花發向陽枝
便覺韶光暗有期
明日重來應爛漫
雙柑斗酒聽黃鸝

湖上暮歸

明
鎰
泰

小驀馱醉踏殘花柔綠陰中一逕斜日暮歸來問童子
春衣當酒在誰家

斷橋分手二首

明史鑑

日暮橋邊酒榼回更因殘唱送餘杯人生易老春光暮
能為看山幾度來

近水人家半掩扉兩山樓閣尚斜暉斷橋無數垂楊柳
總被行人折漸稀

寄杭州友人

明史鑑

西湖湖上水初生重疊春山接郡城記得扁舟載春酒
滿身花影聽啼鶯

西湖聞笛

明 范 言

月白霜寒客夢醒笛聲迴出柳洲亭莫教吹過孤山去
風裏梅花不耐聽

月夜下桐江聞孤雁

明 王叔承

烟月滿江漁火寒一聲孤雁下蘆灘隔天總有家書到
水碧山青不耐看

鏡湖竹枝詞二首

明徐渭

越女紅裙嬌石榴雙雙蕩槳在中流
憨粧又怕旁人笑
一柄荷花遮滿頭

杏子紅衫一女郎鬱金衣帶一葦杭
堤長水濶家何在
十里荷花分外香

題趙文度畫西溪梅花

明謝三秀

欲雪不雪天淒淒南枝北枝開漸齊
因訪梅花過橋去
始知春在西溪西

梅溪

明董份

雲似魚鱗壓市低竹籬載笋出梅溪
逢人閒問崑山路
葛嶺西頭更向西

葛鵲作二首

明董份

笋鞭橫出欲穿籬松子纔生鼠不知
細雨一林山鬼語
白鷗浴起葛公池

鴉銜朱柿墜秋坡竹筴疎籬帶碧莎
野菊滿頭山下女
也能學唱采茶歌

西湖有長年小許每以小舫載予往來湖中臨行

乞畫戲題

明 李流芳

常在西湖烟水邊愛呼小艇破湖烟今朝畫出西泠路
乞與長年作酒錢

贈翁鄞縣

明 錢希言

四明二百八峯盤霧閣雲窻綠玉寒不信謝郎為縣令
三年騎馬未曾看

會稽竹枝詞

明 王 翊

秋風秋雨正淒淒荷葉荷花香滿溪
越女蕩舟愁日暮
歌聲盡在若耶西

鴛鴦湖

明 高承埏

兩湖秋水抱城斜縹緲樓臺帶落霞
日暮鴛鴦看不見
數聲風笛起蘆花

南屏歸艇遇雨

明 譚貞宏

望裏南宮潑墨山小窗殘燭放舟還
從容畢竟輸漁父
藕葉菱花泊淺灣

夜泊常山

明 胡甲桂

淙淙灘響上舟遲到面山容未即移更喜月明迎短櫂
吳吟細聽隔船詞

西湖月夜二首

明 祝淵

落月鱗鱗水面浮露華濃滴桂叢秋不知何處鳴柔櫓
驚起一雙雪色鷗

佛火魚燈漸寂寥推篷起坐已中宵夜來極浦灘聲急
知入西陵第幾橋

西湖

明徐穎

水中樹影樹中山山自無心水自閒
明月兩堤人不見
小舟獨向斷橋邊

國朝

西湖泛月

范承謨

團團十里盡青山
遍插荷花遶水灣
莫怪遊人清興遠
扁舟更載月明還

西溪探梅

范承謨

醉眼朦朧望夕暉
素枝斜映玉烟飛
高歌一曲拈花帶
載得春光午夜歸

鄧東竹枝詞

李鄴嗣

太平海國久無塵
雨瑞風祥四序均
虎不噬生龍不怒
沙蠅何物得浸人

出郭先經東鄧橋
綠楊樹下且逍遙
村翁相約來乘興
一字田頭看揀苗

東湖水滿便堪凭
高下田禾盡望登
最喜太平好

官長官糧不作十分徵

小築曾居邱氏村蒼髯三樹看擎雲春風常約扶
藜去掃石先披孝子墳

山水東鄉足快遊石溪佳句一聯抽輕便度嶺雙
肩轎小巧穿橋獨櫓舟

往年香客徧東家萬里來瞻小白華七塔寺前先
禮拜鳥音已得聽頻伽

小甕黃蘗送草南換來佳味看來饒一餅齏甲純

黃醬千箸魚頭細海鹹

掃葉新生行竈烟適逢客至素羹傳只云水味它
山好試品東鄉小白泉

象坎人家接櫟斜春來白處盡梨花樹頭裏簪深
冬摘一顆真消冰雪查

渡口尋春路不迷管絃樓下綠楊絲尋常留客都
教住唱得當年柳七詞

鄮西竹枝詞

萬斯同

天井山高不可攀，龍藏五窟絕人寰。
鹿亭樊榭無多路，獨有仙人此往還。

西村資福古招提，碧岫為樓嶺作梯。
門外水波千澗落，簷前山影萬峯齊。

望春橋上望春波，草綠蘋香鳧鴨多。
最是城西好風景，共需

帝力聽田歌。

鄞俗由來不尚華，布衣簾飯足生涯。
田家有子皆

知學

文治東漸及遠遐

獨喜林村蠶事稠一村婦女幾家休織成濶幅生
絲絹杼軸咸思

貢篚修

戲詠醉李

吳綺

歌舞無端失舊恩蘇臺響屐總消魂多情只有王
戎李猶帶東牕指甲痕

聞張公綬談武康山水

王士禎

吳興清遠水晶宮轉入前溪路不窮最愛放船人
日好野梅脩竹古防風

毛大可招飲湖舫同錢宮聲倪魯玉聶晉人

尤侗

十里荷花柳七詞至今猶放兩三枝此中消夏差
堪可高卧孤山月上時

送李偉公歸錢塘

尤侗

楚尾吳頭路幾遙
蟬鳴堤柳影蕭蕭
君歸湖上西泠口
已過錢塘八月潮

歸去南屏自結廬
不須長盼越江書
青荷碧荇尊絲菜
紫鱗紅蝦簞葉魚

鶯脰湖二絕句

宋 輦

垂虹亭畔峭颿開
鶯脰湖中激箭來
我是滄浪濯纓客
寄聲鷗鳥莫相猜

孤舟落日漾波心
湖樹湖烟四望深
空際一聲聞

欵乃釣徒何處許追尋

洞霄宮題壁

朱彝尊

天柱峯高倚晚晴琳宮消歇斷碑橫
砂牀竹卜搜難得臥聽山禽擣藥聲

鑑湖

朱彝尊

狂客當年歸四明經過遺跡不勝情
澄湖一曲明如鏡身在山陰道上行

若耶溪二首

朱彝尊

若耶溪頭春水深南風北風樵採音浣紗女兒不
得見清江日暮愁人心

渡口乘潮漾北風輕舟如馬泝江東明朝又是山
陰道身在千巖萬壑中

西湖竹枝詞六首

朱彝尊

西子湖平鏡面揩雷峯倒影象金釵雲鬟粧就石
新婦香草為裙筍作鞵

山到逋留城下平橋從慶忌塔前橫郎家側近水

仙廟可識水仙王姓名

西曲誰家窈窕孃獨開小店松毛塲何年偷得江
陵樣織就女兒黃竹箱

岳王祠外舞臺偏半在湖塘半在田怕值油車藕
小小勸郎騎馬不如船

養魚莊說養魚肥放鶴亭看放鶴歸妾在鳳凰山
下佳生來不見鳳凰飛

湖面蓴絲寸寸長為郎情好作羹湯朝雲吹散峯

頭雨日出團團雞子黃

南鎮春游詞

毛奇齡

春船兩槳白蘋開
十里橫塘晚未迴
南鎮祠前北風急
夏王陵上雨飛來

鷓鴣艇子鹿頭車
山路深深雨又斜
何處相逢增懊惱
凌家山下看桃花

香鑪峯峻少人登
兩兩三三上禹陵
陵前草深花似霧
山頭風急雨如繩

泛舟西湖夜半始歸

周起渭

錢塘門外烟如織
放鶴亭前水似油
櫂撥綠醅衣
染翠小舟一葉漾中流

城中拄頰見青山
寄與飛鴻落照間
烟靄殢人行
不進棟花風裏櫂舟還

烟水瀾漫晚櫂迷
峯嵐出沒翠鬟低
數聲短笛臨
風急千縷殘霞落水西

輕煙淡粉各叢叢
水色山光晚盡融
却是畫師描

不就夜山燈火碧流中

南湖

唐夢賚

瑟瑟雲林晚照湖亭亭波影立浮圖攝衣絕頂憑欄去便近諸天星宿無

閒亭水木見蒼涼小艇滌洄一櫂長雙鶴都隨和靖老漁家鷗鷺自成莊

雨中過蕭山

龔翔麟

歸田不覺一年半欲到山陰竟未能今日始償山

水債斜風細雨渡西興

西湖四首

湯右曾

放船已過賈亭西一帶丰茸草沒隄忽聽危樓動
殘角斷橋回首便淒迷

舞裙歌板小嬋娟詞客偏於別恨牽蘇小小家春
在否幾株楊柳認門前

疎星幾點漸窺簷天際空濛水欲黏待遣老龍吹
鐵笛催將銀海上金蟾

似此歡遊未偶然風埃蓬勃動經年明朝人事侵
尋去媿與山靈續後緣

湖上春詞

洪昇

滿湖春水蕩晴煙幾處春陰散碧天月出慣留歌
舞席風生不送別離船

湖上漫興

王式丹

康樂遊山興未孤尋詩今更到明湖西冷橋畔天
如水留得一枝如蓋無

予十六年遊湖上詠西冷橋古松云一枝如蓋暮天

清

南屏春暮好閒行
徙倚斜陽見落英
樹底一方春水綠
塔巔十丈晚霞頰

送李梧岡還東陽

周炳曾

君出梅關暑亦徂
我行有待食霜鱸
紫微巖裏棲劉峻
蠟屐亭邊問阮孚

詞

漁父歌

唐
張志和

西塞山前白鷺飛
桃花流水鱖魚肥
青筍笠綠簑衣
斜風細雨不須歸

釣臺漁父褐為裘
兩兩三三舴艋舟
能縱櫂慣乘流
長江白浪不曾憂

雪谿灣裏釣魚翁
舴艋為家西復東
江上雪浦邊風笑
著荷衣不歎窮

憶江南

杭州

唐白居易

江南憶最憶是杭州
山寺月中尋桂子
郡亭枕上看潮

頭何日更重遊

沁園春

吳興懷古

宋 陳人傑

落日都門買得扁舟乘興而東正苔川半夜月寒似水
蘋洲一路秋老多風攜妓溪山尋春歲月往事黃梁昨
夢中高樓上問何人懷古湖海元龍 諸君邂逅相逢
更休問奚奴金錯空向瑣窻看鏡鬢無霜白玉舫揮酒
臉有潮紅萼美鱸肥橙香鱗壯風味不如歸興濃明朝
去有西門一水直與天通

酒泉子

宋 潘 閬

長憶西湖湖水上盡日憑闌樓上望三三兩兩釣魚舟
島嶼正清秋 笛聲依約蘆花裏白鳥成行忽驚起別
來閒整釣魚竿思入水雲寒

長憶孤山山下麓山矗湖心如黛簇僧房四面向湖開
輕棹去還來 芰荷香噴連雲閣閣上清聲簷下鐸別
來塵土污人衣空役夢魂飛

長憶西山山骨瘦靈隱寺前三竺後冷泉亭子幾經遊

三伏似清秋 白猿時見攀高樹長嘯一聲何處去別
來幾向畫圖看終是欠峯巒

長憶高峯峯一對峯上塔高塵世外昔年獨上最高層
月出見微稜 舉頭咫尺疑天漢星斗分明在身畔別
來無翼可飛騰何日得重登

望海潮

宋 柳 永

東南形勝三吳都會錢塘自古繁華煙柳畫橋風簾翠
幕參差十萬人家雲樹繞隄沙怒濤捲霜雪天塹無涯

市列珠璣戶盈羅綺競豪奢
重湖疊巘清佳有三秋
桂子十里荷花羌笛弄晴菱歌泛夜
嬉嬉釣叟蓮娃
千騎擁高牙乘醉聽歌鼓吟賞煙霞異日圖將好景
歸去鳳池誇

木蘭花

吳興寒食

宋
張先

龍頭舴艋吳兒競
筍柱鞦韆遊女並
芳洲拾翠暮忘歸
秀野踏青來不定
行雲去後遙山暝
已放笙歌池院靜
中庭月色正清明
無數楊花過無影

河滿子

陪杭守泛潮夜歸

宋張先

溪女送花隨處沙鷗避樂分行遊舸已如圖障裏小屏
猶畫瀟湘人面新生酒艷日痕更欲春長衣上交枝
鬪色釵頭比翼相雙片段落霞明水底風紋時動粧光
賓從夜歸無月千燈萬火湖塘

醉垂鞭

錢塘送祖擇之

宋張先

酒面艷金魚吳娃唱吳湖上玉殿白麻書待君歸後除
勾留風月好平湖曉翠峯孤此景出關無西州空畫

圖

天香引

遊嘉禾南湖

宋文同

三月三花霧吹晴見麟鳳
滄洲鴛鴦沙汀華鼓清簫紅
雲蘭棹青紵旗亭細看來
春風世情都分在流水歌
聲剪燕嬌鶯冷笑詩仙擊楫揚舲

天香引

拜和靖祠

宋文同

正當時處士山祠漸以南枝春事些
兒楓漬殷脂蕉撕
故紙柳死荒絲自寒澁
雌雄鷺鷥翅叅差
母子鷗鷺

再四嗟咨撫此吟髭彈指歌詩

南歌子

錢塘晚眺

宋 蘇軾

山雨蕭蕭過溪橋
瀏瀏清小園
幽榭枕蘋汀
門外月華如水
綵舟橫
苔岸霜花盡
江潮雪陣平
兩山遙指海門青
回首水雲何處覓孤城

瑞鷓鴣

觀潮

宋 蘇軾

碧山影裏小紅旗
儂是江南踏浪兒
拍手欲嘲山簡醉
齊聲爭唱浪婆詞
西興渡口帆初落
漁浦山頭日未

移儂欲送潮歌底曲樽前還唱使君詩

八聲甘州

送參寥子

宋 蘇軾

有情風萬里捲潮來無情送潮歸問錢塘江上西興浦
口幾度斜暉不用思量今古俯仰昔人非誰似東坡老
白首忘機記取西湖西畔正暮山好處空翠煙霏算
詩人相得如我與君稀約他年東還海道願謝公雅志
莫相違西州路不應回首為我沾衣

江城子

錢塘江上

宋 蘇軾

鳳凰山下雨初晴
水風清
晚霞明
一朵芙蓉開
遍尚盈
盈何處飛來雙白鷺
如有意慕娉婷
忽聞江上弄哀
筇苦含情遣誰聽
烟歛雲收依約是湘靈
欲待曲終尋
問取人不見數峯青

臨江仙

上巳日游海昌王氏園

宋葛勝仲

倦客身同舟不繫輕帆來訪儒仙
春風元已艷陽天
桃方散錦高柳欲飛綿
千古海昌佳絕地
雙鳬暫此
留連
通宵娛客展芳筵
蘭亭修契事梓澤
醉名園

虞美人

卜居青墩鎮

宋 陳與義

扁舟三日秋塘路
平度荷花去
病夫因病得來遊
更值滿川微雨洗新秋
去年長恨拏舟晚
空見殘荷滿
今年何以報君恩
一路繁華相送到青墩

水龍吟

趙祖文畫西湖圖名曰總相宜

宋 晁補之

西湖天下應如是
誰喚作真西子
雲凝山秀日增波
媚宜晴宜雨况值深秋
更當遙夜月華如水
記詞人解道

丹青妙手應難寫真奇語
往事輸他范蠡泛扁舟仍
攜佳麗毫端幻出淡粧濃抹可人風味和靖幽居老坡
遺跡也應堪記更憑君畫我追隨二老遊千家寺

摸魚兒

錢塘江觀弄潮

宋 辛棄疾

望飛來半空鷗鷺須臾動地
鼙鼓截江組練驅山去塵
戰貌虎朝又暮悄慣得吳兒
不怕蛟龍怒風波平步看
紅旆驚飛跳魚直上蹴踏浪
花舞憑誰問萬里長鯨
吞吐人間兒戲千弩滔天力
倦知何事白馬素車東去

堪恨處人道是子胥冤憤終千古功名自誤謾教得陶
朱五湖西子一舸弄煙雨

念奴嬌

西湖和人韻

宋 辛棄疾

晚風吹雨戰新荷聲亂明珠蒼壁誰把香奩收寶鏡雲
錦周遭紅碧飛鳥翻空遊魚吹浪慣趁笙歌席坐中豪
氣看公一飲千石 遙想處士風流鶴隨人去已作飛
仙客茅舍疎籬今在否松竹已非疇昔欲說當年望湖
樓下水與雲寬窄醉中休問斷腸桃葉消息

小重山

與客游西湖

宋 辛棄疾

綠漲連雲水拂空十分風月處著衰翁垂楊影斷岸西
東君恩重教且種芙蓉十里水晶宮有時騎竹馬笑
兒童殷勤却謝打頭風船兒住且醉浪花中

漢宮春

會稽秋風亭觀雨

宋 辛棄疾

亭上秋風記去年嫋嫋曾到吾廬山河舉目雖異風景
非殊功成者去覺團扇便與人疎吹不斷斜陽依舊茫
茫禹跡都無千古茂林猶在甚風流章句解擬相如

只今木落江冷渺渺愁余故人書報莫因循忘却尊鱸
誰念我新涼燈火一編太史公書

浣溪沙

泛舟還餘英館

宋 毛滂

烟柳風蒲冉冉斜小窻不用著簾遮將山影轉灣沙
畧約斷時分岸色蜻蜓立處過汀花此情此水共天
涯

又 寒食東堂對酒

宋 毛滂

小雨初收蜨做團和風輕拂燕泥乾秋千院落落花寒

莫對清尊追往事更催新火續餘歡一春心緒倚欄杆

夜行船

餘英溪

宋毛滂

弄水餘英溪畔綺羅香日遲風慢桃花春浸一篙深畫
橋東柳低烟遠漲綠流紅空滿眼倚蘭橈舊愁無限
莫把鴛鴦驚去要歌時少低檀板

風入松

西湖

宋俞國寶

一春長費買花錢日日醉湖邊玉驄慣識湖邊路驕嘶

過沽酒樓前紅杏香中歌舞綠楊影裏鞦韆
暖風十里麗人天花壓鬢雲偏畫船載酒春歸去餘情付湖水
湖煙明日重扶殘醉來尋陌上花鈿

念奴嬌

觀潮

宋陸凝之

遠山一帶遡晴空極目天涯浮白楓落鴉翻談笑處不
覺雲濤橫席酒病方蘇睡魔猶殢一掃無留迹吳帆越
櫂恍然飛上空碧長記草賦梁園凌雲筆勢倒三江
秋色對此驚心空悵望老作紅塵閒客別浦烟平小樓

人散回首千波寂西風掃露為君重噴霜笛

柳梢青

題豐樂樓

宋

趙汝愚

水月光中烟霞影裏湧出樓臺空外笙簫人間笑語身
在蓬萊 天香暗逐風回正十里荷花盡開買箇輕舟
山南遊遍山北歸來

水調歌頭

處州烟雨樓落成

宋

李處全

樓觀數南國烟雨壓東州溪山雄勝天開圖畫肖瀛洲
我破瀛洲客夢來部仙都符竹樂歲又三秋聊作幻師

戲肯遣後人愁 趣佳時招我輩共凝眸君侯曾次一
壑意匠付冥搜刻日落成華棟對月難并清景千丈素
光流老子興何極小飲趣觥籌

念奴嬌

吳興荷花

宋姜夔

關紅一舸記來時長與鴛鴦為侶三十六陂人未到水
珮風裳無數翠葉吹涼玉容銷酒更洒菰蒲雨嫣然搖
動冷香飛上詩句 日暮青蓋亭亭仙人不見爭忍凌
波去只恐舞衣寒易落愁入西風南浦高柳垂陰老魚

吹浪留我花間住田田多少幾回沙際歸路

惜紅衣

吳興荷花

宋姜夔

簾枕邀涼琴書換日睡餘無力細洒冰泉并刀破甘碧
牆頭換酒誰問訊城南詩客岑寂高樹晚蟬說西風消
息鷓鴣雙飛鴛鴦斂翼來戲水陌魚浪吹香紅衣半
狼藉維舟試望故國渺天北可惜渚邊沙外不共美人
遊歷問甚時同賦三十六陂秋色

賀新郎

游西湖

宋劉過

睡覺啼鶯曉醉西湖兩峯日日買花簪帽去盡酒徒無人問惟有玉山自倒任拍手兒童爭笑一舸乘風翩然去避魚龍不見波聲悄歌韻遠喚蘇小神仙路近蓬萊島紫雲深參差禁樹有煙花遶人世紅塵西障日百計不如歸好付樂事與他年少費盡柳金梨雪句問沉香亭北何時召心未慙鬢先老

酹江月

題釣臺

宋王自中

扁舟夜泛向子陵臺下偃帆收櫓水濶風搖舟不定依

約月華新吐細酌清泉痛澆胸臆喚起先生語當年綸
釣為誰高臥烟渚還念古往今來功名可共能幾人
光武一旦星文驚四海從此故人何許到底軒裳不如
蓑笠久矣心相與天低雲淡浩然吾欲高舉

夜行船

越中作

宋

丘 宙

水滿平湖香滿路繞重城藕花無數小艇紅粧踈簾青
蓋烟柳畫船斜渡恣樂追涼忘日暮簫鼓月明人去
猶有清歌迢遞聲在菱荷深處

曲游春

清明湖上

宋施岳

畫舸西泠路占柳陰花影芳意如織小楫衝波度麴塵
扇底粉香簾隙岸轉斜陽隔又過盡別船簫笛傍斷橋
翠統紅圍相對半篙晴色頃刻千山暮碧向沽酒樓
前猶繫金勒乘月歸來正梨花夜縞海棠烟幕院宇明
寒食醉乍醒一庭春寂任滿身露濕東風欲眠未得

聲聲慢

閨梅孤山

宋李演

輕鞚繡谷柔屐烟堤六年遺賞新續小舫重來惟有寒

沙鷗熟徘徊舊情易冷但溶溶翠波如縠愁望遠甚雲
消月老暮山自綠 嘯笑人生悲樂且聽我樽前漁歌
樵曲舊閣塵封長得樹陰如屋淒涼五橋歸路載寒秀
一枝疎玉翠袖薄晚無言空倚修竹

臨江仙

西湖春泛

宋 趙 潛

堤曲朱牆近遠山明碧瓦高低好風二十四花期驕驄
穿柳去文鷁挾波飛 簫鼓晴雷殷殷笑歌香霧霏霏
閒情不受酒禁持斷橋無立處斜日欲歸時

齊天樂

登禹陵

宋

吳文英

三千年事殘鴉外無言倦憑秋樹逝水移川高陵變谷
那識當時神禹幽雲怪雨恨萍濕空梁夜深飛去雁起
青天數行書似舊藏處寂寥西窗坐久故人慳會遇
同剪燈語敗蘚殘碑零圭斷壁重拂人間塵土霜紅罷
舞謾山色青青霧朝烟暮岸鎖春船畫橋翻賽鼓

西子粧

湖上清明薄遊

宋

吳文英

流水麴塵艷陽酤酒畫舸遊情如霧笑拈芳草不知名

乍凌波斷橋西堍垂楊謾舞總不解將春繫住燕歸來
問綵繩纖手如今何許歡盟誤一箭流光又趁寒食
去不堪衰鬢著飛花傍綠陰冷烟深樹玄都秀句記前
度劉郎曾賦最傷心一片孤山細雨

祝英臺近

春日客龜溪

宋吳文英

采幽香巡古苑竹冷翠微路闌草溪根沙印小蓮步自
憐兩鬢清霜一年寒食又身在雲山深處晝閒度因
甚天也慳春輕陰便成雨綠暗長亭歸夢趁風絮有情

花影欄杆鶯聲門徑解留我霎時凝佇

高陽臺

豐樂樓

宋

吳文英

修竹凝粧垂楊駐馬憑欄淺畫成圖山色誰題樓前有
雁斜書東風緊送斜陽下弄舊寒晚酒醒餘自消凝能
幾花前頓老相如傷春不在高樓上在燈前欹枕雨
外熏爐怕艤遊船臨流可奈清癯飛紅若到西湖底攪
翠瀾總是愁予莫重來吹盡香綿淚滿平蕪

水龍吟

雪霽登吳山見滄閣

宋

翁元龍

畫樓紅濕斜陽素粧褪出山眉翠街聲暮起塵侵鐙戶
月來舞地官柳招鶯水燕颺雁隔年春意黯梨雲散作
人間好夢瓊簫在錦屏底樂事輕隨流水暗蘭消作
花心計情絲萬軸因春織就愁羅恨綺昵枕迷香占簾
看夜舊游經醉任孤山剩雪殘梅漸嬾跨東風騎

謁金門

雪上秀邸溪亭

宋吳潛

溪邊屋不淺不深閨簇野樹平蕪秋滿目有人閒意足
旋喚一樽醺醖菱芡煮來新熟歸去來詞歌數曲醉

時無檢束

念奴嬌

上巳曲水園

宋 盧炳

快風收雨正江城初霽物華如許麗日融和春思好是
處鶯啼燕語嫩綠成陰落紅堆繡只恐春將暮園林清
晝看看又見飛絮太守無限風流鈴齋多暇載酒郊
原路隊隊旌旗明閃爍鼓吹更翻新譜曲水流觴蘭亭
修禊俯仰成今古為君一醉歸時樓上三鼓

酹江月

觀潮應制

宋 吳玘

玉虹遙挂望青山隱隱有如一抹忽覺天風吹海立好
似春霆初發白馬凌空瓊鼉駕水日夜朝天闕飛龍舞
鳳鬱蔥環拱吳越此景天下應無東南形勝偉觀真
奇絕好是吳兒飛彩幟蹴起一江秋雪黃屋天臨水犀
雲擁看擊中流楫晚來波靜海門飛上明月

摸魚兒

湖上

宋杜旗

放扁舟萬山環處平鋪碧浪千頃仙人憐我征塵久偕
與夢游清枕風乍靜望兩岸羣峯倒浸玻瓈影樓臺相

映更日薄烟輕荷花似醉飛鳥墮寒鏡
中都內羅綺
千街萬井天教此地幽勝仇池仙伯今何在隄柳幾眠
還醒君試問問此意只今更有何人領功名未竟待學
取鴟夷仍攜西子來動五湖興

烏夜啼

西湖

宋
盧祖臯

漾煖紋波颭颭吹晴絲雨濛濛輕衫短帽西湖路花氣
撲春驄
鬪草褰衣濕翠秋千瞥眼飛紅日長不放春
醪困立盡海棠風

水龍吟

錢塘作

宋 陳以莊

晚來江濶潮平越船吳榜催人去稽山滴翠胥濤濺恨
一襟離緒訪柳章臺問桃仙浦物華如故向秋娘渡口
泰娘橋畔依稀是相逢處窈窕青門紫陌舊羅新衣
翻金縷舊音恍記輕攏慢撚哀絃危柱金屋難成阿嬌
已遠不堪春暮聽一聲杜宇紅殷綠老雨花風絮

摸魚兒

西湖送春

宋 陳允平

倚東風畫欄十二芳陰簾幕低護玉屏翠冷梨花瘦寂

冥小樓烟雨腸斷處悵折柳柔情舊別長亭路年華似
羽任錦瑟聲寒瓊簫夢遠羞對綵鸞舞文園賦重憶
河橋眉嫵啼痕猶濺紈素丁香共結相思恨空託繡羅
金縷春已暮縱燕約鶯盟無計留春佳傷春倦旅趁暗
綠稀紅扁舟短檣載酒送春去

曲游春

游西湖

宋周密

禁苑東風外颺煖絲晴絮春思如織燕約鶯期惱芳情
偏在翠深紅隙漠漠香塵隔沸十里亂絲叢笛看畫船

盡入西村閒却半湖春色 柳陌新烟凝碧映簾底宮
眉堤上游勒輕暝籠烟怕梨雲夢冷杏香愁暮歌管酬
寒食奈蛺蝶怨良宵岑寂正恁醉月搖花怎生去得

謁金門

吳山觀濤

宋周密

天水碧染就一江秋色鰲戴雪山龍起蟄快風吹海立
數點烟鬟青滴一杼霞綃紅濕白鳥明邊帆影直隔
江聞夜笛

高陽臺

西湖春感

宋張炎

接葉巢鶯平波卷絮斷橋斜日歸船能幾番游看花又是明年東風且伴薔薇住到薔薇春已堪憐更悽然萬綠西泠一抹荒烟當年燕子知何處但苔深韋曲草暗斜川見說新愁如今也到鷗邊無心再續笙歌夢掩重門淺醉閒眠莫開簾怕見飛花怕聽啼鵑

月下笛

甬東積翠山舍

宋張炎

萬里孤雲清遊漸遠故人何處寒窗夢裏曾記經行舊時路連昌約畧無多柳第一是難聽夜雨謾驚回悽悄

相看燭影擁衾誰語 張緒歸何暮伴冷落依依短橋
鷗鷺天涯倦旅此時心事良苦只愁重洒西州淚問杜
曲人家在否恐翠袖正天寒猶倚梅花那樹

臺城路

杭友抵越適鑑曲漁舍會飲

宋張炎

春陰不暖垂楊柳吹却絮雲多少燕子人家夕陽巷陌
行入野畦深窈蒔花鬪草記小艇尋芳斷橋初曉那日
心情幾人同向近來老 消憂何處最好夜遊頻秉燭

猶是遲了南浦歌闌東林社冷贏得如今懷抱吟悵暗
惱待醉也慵聽勸歸啼鳥怕攪離愁亂紅休去掃

多麗

西湖泛舟

元

張翥

晚山青一川雲樹冥冥正參差烟凝紫翠斜陽畫角出
南屏館娃歸吳臺遊鹿銅仙去漢苑飛螢懷古情多凭
高望極且將尊酒慰颼零自湖上愛梅仙遠鶴夢幾時
醒空留在六橋疎柳孤嶼危亭待蘇堤歌聲散盡更
須攜客西泠藕花深雨涼翡翠菰蒲軟風弄蜻蜓澄碧

生秋闌紅駐景採菱新唱最堪聽一片水天無際漁火
兩三星多情月為人留照未過前汀

八犯玉交枝

招寶山觀月上

元

仇

遠

滄島雲連綠瀛秋入暮景却沉洲渚無浪無風天地白
聽得潮生人語擎空孤柱翠倚高閣凭虛中流蒼碧迷
烟霧惟見廣寒門外青無重數 不知是水是山不知
是樹漫漫知是何處倩誰問凌波輕步謾凝睇乘鸞秦
女想庭曲霓裳正舞莫須長笛吹愁去怕喚起魚龍三

更噴作前山雨

虞美人

浙江舟中作

元趙孟頫

潮生潮落何時了
斷送行人老
消沉萬古意
無窮盡在
長空澹澹鳥飛中
海門幾點青山小
望極烟波渺
何當駕我以長風
便欲乘槎浮到日華東

木蘭花慢

西湖送春

元梁曾

問花花不語
為誰落
為誰開
莫春色三分半
隨流水半入塵埃
人生能幾歡笑
但相逢
尊酒莫相推
千古幕天

席地一春翠繞珠圍 彩雲回首暗高臺烟樹渺吟懷
拚一醉留春留春不住醉裏春歸西樓半簾斜日怪銜
春燕子却飛來一枕青樓好夢又教風雨驚回

霓裳中序第一

四聖觀

元羅志仁

來鴻又去燕看罷江潮收畫扇謾湖曲雕欄倚倦正船
過西陵快篙如箭凌波人不見但陌花遺曲淒怨孤山
路晚蒲病柳淡綠鎖深院 離恨五雲宮殿記舊日曾
游翠輦青紅如寫便而悵下鷗池荒放鶴人遠粉牆隨

岸轉漏壁瓦殘陽一線蓬萊夢人間那信坐看海濤淺

風流子

西湖

元羅志仁

歌咽翠眉低湖船客尊酒謾重攜正斷續齊鐘高峯南
北颼零野褐太乙東西淒涼處翠連松九里繡馬滅障
泥葛嶺樓臺夢隨烟散吳山宮闕恨與雲齊靈峯飛
來久飛不去有落日斷猿啼無限風荷廢港露柳荒畦
歎岳公英骨麒麟舊塚坡仙吟魄鶯燕長堤欲弔梅花
無句素壁慵題

滿江紅 題富春館

元 黃子行

津鼓匆匆猶記得故人相送春江上鳥啼花影馬嘶香
聲情逐陽關金縷斷淚和楊柳春絲重算別來幾度月
明時相思夢 山萬疊秋眉聳春一點歸心動問風倚
月侶有誰遊從百里家山明日到一尊芳酒今宵共任
樓頭吹盡五更風梅花弄

水龍吟 西湖懷古

元 陳德武

東南第一名州西湖自古多佳麗臨堤臺榭畫船樓閣

遊人歌吹十里荷花三秋桂子四山晴翠使百年南渡
一時豪傑都忘却平生志 可惜天旋時異藉何人雪
當年恥登臨形勝感傷今古發揮英氣力士推山天吳
移水作農桑地借錢塘潮少為君洗盡岳將軍淚

念奴嬌

八詠樓

元
鮮于樞

長溪西注似延平雙劍千年初合溪上千峯明紫翠放
出羣龍頭角瀟灑雲林微茫烟草極目春洲濶城高樓
迴恍然身在寥廓 我來陰雨兼旬灘聲怒起日日東

風惡須待青
天明月夜
一試嚴維
佳作風景
不殊溪山
信美處處
堪行樂休
文何事年
年多病如
削

多麗

清明飲西湖壽樂園

元張翥

鳳凰簫新聲遠度
蘭橈漾東風湖光
十里參差綠港紅
橋暖雲蘸鬱金衫
色晴烟抹翡翠裙
腰卷畫名園闌紅
芳樹蒲葵亭畔綵
繩搖鴛鴦落英堪
藉猶作殢人嬌漬
羅袂莫愁痕褪生
怕香銷憶當年尊
前扇底多情冶
葉倡條分蘭女隔
花偷盼修禊客臨
水相招舊約尋歡

新聲換譜三生夢裏可憐宵縱留得楝花寒在啼鴂已
無聊江南恨越王臺下幾度迴潮

望海潮

清明登定海招寶山望海

元

張翥

扶桑何許蓬萊何處滄海一望漫漫精衛解填龜鼉可
駕凌波直度三韓雲氣有無閒只是天是水無地無山
鼉扇鼉掀颶風俄起晝生寒從今不數鮑桓美秦人
採藥龍伯垂竿槎信未來珠光暗徙羣仙約我驂鸞長
嘯壯懷寬且振衣絕頂醺酒長瀾揮手相招片帆飛趁

暮潮還

木蘭花慢

孤山問梅

元張翥

愛西湖千樹曾幾度為攜尊向柳外停梳苔邊待鶴酒
熟香溫瀛洲舊時月色悵蒼涼惟有數枝存天上梨花
成夢江南桃葉移根如今寂寞對孤村難返暗香魂
甚歲晚春遲角寒笛曉雪暗雲昏登臨不堪寄目但青
山影影月紛紛再約與君同醉從他啄木敲門

水龍吟

題湖山勝概寺

元張翥

翠微曾共登臨冷光斂艷三千頃玉京佳處景雖天造
也因人勝若把西施淡粧濃抹兩相比並道此間如對
姮娥仙子慵梳掠臨鸞鏡滿意曲闌芳徑早安排雨
篷烟艇茶甌雪卷紋楸雹碎醉魂初醒湖海高情林泉
清意幾人能領算知音只有中宵涼月浸蓬萊影

水龍吟

游錢塘西山

元張埜

一鞭空翠烟霏笑談已到山深處丹崖翠壁野猿遊鳥
冷泉高樹兜率天中蓬壺境內偶成佳遇正捫參歷井

窮探未了回首早趺鐘暮
畫舸亭亭橫渡醉歸來被
誰留住雲窻霧閣羣仙應笑塵緣相誤白雪歌殘青鸞
夢覺滿身風露料明年却向古臺高處憶桃源路

菩薩蠻

越城晚眺

明 劉基

西風吹散雲頭雨斜陽却照天邊樹樹色蕩湖波波光
艷綺羅 征鴻何處起點點殘霞裏月上海門山山河
莽蒼間

浣溪沙

處州葉叔安溪門草堂

明 劉基

細草垂楊村巷幽
白沙素石引溪流
青苔磯上有扁舟
門外好山開畫屋
頭新月學簾鉤
窗風一榻似清秋

玲瓏四犯

台州作

明劉基

白露點珠明
河生浪秋光看一半
翠衾知夜永
夢冷孤館南樓數聲過
雁西池桂花零亂
歲序如何江山若此
贏得霜髻滿
傷心漫回愁眼見
蛩吟蔓草螢度荒墻
淚隨黃葉下事逐浮雲散
滄波滾滾東流去問誰是登

樓王粲菊綻籬邊賦歸來恐晚

望江南

西湖四首

明瞿佑

西湖景春日最宜晴花底管絃公子宴水邊羅綺麗人行十里按歌聲

西湖景夏日正堪遊金勒馬嘶垂柳岸紅粧人泛採蓮舟驚起水中鷗

西湖景秋日更宜看桂子岡巒金粟富芙蓉洲渚彩雲閒爽氣滿前山

西湖景冬日轉清奇賞雪樓臺評酒價觀梅園圃定春
期共醉太平時

滿庭芳

西湖秋泛

明瞿佑

露葦催黃烟蒲駐綠水光山色相連紅衣落盡辜負採
蓮船點檢六橋楊柳但幾個抱葉殘蟬秋容晚雲寒雁
背風冷鷺鷥肩華筵容易散愁添酒量病減詩顛况
情懷冲淡漸入中年掃退舞裙歌扇盡付與一枕高眠
清閒好脫巾露髮仰面看青天

滿庭芳

登道場山

明

王世貞

一雨催涼千崖吐秀萬壑爭效潺湲暫停籃筍攜杖翠
微間點點龍鱗玉甃堪憐處屐齒敲慳朱闌外粘天萬
頃七十二峯間呼樽誇更有有松飈鳳吹雲岫鴟鬣
又誰送黃鸝弄巧唱綿蠻漫問何山最好爭應道還有
何山能移興新晴月色飛步上孱顏

蝶戀花

蘇堤春曉

明

莫璠

十里樓臺花霧繞宜雨宜晴山色籠春曉楊柳枝頭殘

月小海棠枝上猶眠鳥
蘭帳玉人初睡覺試問樓前
畫舫開多少報道尋芳人起早紫騮嘶過香塵道

又 平湖秋月

明 莫 璠

璧月沉輝湖淥靚一色琉璃倒浸山河影花外瓊宮明
愈瑩人間無此清涼境 笑擷芙蓉乘舴艋醉掬文漪
搖動金千頃欲喚坡僊同賦咏桂花露濕衣襟冷

又 斷橋殘雪

明 莫 璠

快雪時晴寒尚冱玉屑銀沙紛滿湖南路一道垂虹如

約素裙腰草色非前度
斷玦遺環愁日暮想像凌波
羅襪應難步欲探梅花無處所
山童指點逋仙墓

又雷峯夕照

明莫璠

古塔斜陽紅欲暝西崦人家半在桑榆影
水印殘霞如濯錦烟花佛國非凡境
十里畫船歸欲盡漁唱菱歌別是湖中景
待月有人樓上等珠簾半捲欄重凭

又麴院風荷

明莫璠

五月涼風來麴院綠水芙蓉紅
白都開遍風遞花香清

不斷採蓮舟過歌聲緩
醉折碧筒供笑翫翠蓋紅銷
高下翻零亂向晚新涼生酒面六銖衣薄停紈扇

又花港觀魚

明
莫璠

杜若浮香春霽雨浪煖桃花錦漲鴛鴦渚碧藻叢深菱
葉底纖鱗吹沫搖頰尾戲把金鈎垂綠水却憶雕闌
翠袖人同倚腸斷蕭娘書一紙相思欲報憑雙鯉

又南屏晚鐘

明
莫璠

翠巖深深幾許佛閣華鐘鯨吼西風裏回首南莊行

樂地暝烟隔斷青蓮宇 宴飲芳園人散去金鑰嚴城

次第催將閉一望長橋燈火起絳紗影裏聯歸騎

又柳浪聞鶯

明 莫 璠

西子湖頭春過半萬縷垂楊洵似波紋亂黃褪綠勻誰
暗換俊遊來繫花驄慣紅喙嬌鶯啼緩緩韻叶笙簧
幾被風吹斷惱亂佳人停鳳管背花偷把春纖按

又三潭印月

明 莫 璠

秋靜寒潭澄見底玉色蟾蜍飛入清冷水睡熟驪龍呼

不起領珠光照冰壺裏
讌賞此時能有幾
遙憶同歡

今夜人千里
試問龍淵深幾許
騎鯨欲共姮娥語

又

兩峯插雲

明
莫璠

南北雙峯雲氣繞
玉削芙蓉迴出青天表
金碧浮圖瞻
縹緲朱甍繡檻臨黃道
下界紅塵飛不到
東望彤庭
日出扶桑曉
願借謫仙希有烏瑤笙
吹上蓬萊島

國朝

滿江紅

錢塘觀潮

曹溶

浪湧蓬萊高飛撼宋家宮闕誰盪激靈胥一怒惹
衝冠髮點點征帆都卸了海門急鼓聲初發似萬
羣風馬驟銀鞍爭超越江妃笑堆成雪鮫人舞
圓如月正危樓湍轉晚來愁絕城上吳山遮不盡
亂濤穿到嚴灘歇是英雄未死報讐心秋時節

醜奴兒令

月夜泛舟西湖

龔翔麟

一湖風漾當樓月涼滿人間我與青山冷澹相看
不等閒藕花社榜疎狂約綠酒朱顏放進嬋娟

今夜紗窗可忍闌

木蘭掀蕩波光碎人似乘潮何處吹簫輕逐流螢
度畫橋白鷗睡熟金鈴悄好是蕭條多謝雙高
折簡明朝不用招

清輝依約雲鬟綠水作菱花蘇小天斜不見留人
駐晚車湖山符牒誰能管讓與天涯如此豪華
除却芳樽一味賒

菩薩蠻

春日憶西湖次陸蓋思徐竹逸倡和原韻

陳維崧

劃波曾向西冷去掠入綠痕難唾處疎簾雜眠鷗
真成自在遊如今佳興歇悶過春三月剛見摘
蘭芽山村又焙茶

水調歌頭

送憚南田之錢塘并柬毛稚黃

陳維崧

躡屨上靈隱吹笛下吳淞送君恰直新爽纖月印
船篷猶憶冷泉亭上百道跳珠噴雪飛瀑挂杉松

一別十八載，吾老漸成翁。
故人去，攜筆墨，瀉空濛。
不知老已將至，揮洒醉偏工。
為訊鹽橋毛子，果否別來無恙，底事斷詩筒。
人世作達耳，長邑鬱焉窮。

賀新郎

鴛湖烟雨樓感舊

陳維崧

水宿楓根罅，儘沾來、鷺黃老釀。
銀絲鮮鮓，記得筇堂和伎，館儘是儀同僕。
射園都在水邊林下，不閉春城，因夜醺望滿湖燈火。
金吾怕十萬，盞紅毬挂。

重遊陂澤偏瀟灑
剩空潭半樓烟雨玲瓏如畫
人世繁華原易了
快比風檣陣馬消幾度城頭鐘
打惟有鴛鴦湖畔月
是曾經照過傾城者波織簾
船堪藉

永遇樂

送園次歸吳興

陳維崧

古渡西風亂山落照明日將雨
手內金樽橋頭畫艇漸到
銷魂處踏臂狂歌掉頭長嘯
萬事總隨花絮歎英雄古今無主
夜來酒邊曾訴
路出橫塘

船經夾浦莫問師師舉舉且減柔情還憑老手只
種金城樹學士亭邊醉翁亭在多少名賢來去喜
到日一湖碧浪全家團聚

南樓令

泛月至湖心亭

沈進

落日四無塵天青雁幾羣倚輕橈客過前津未老
芙蓉秋有恨對粧鏡翠蛾顰亭子隔湖心花深
月轉深聽宵鐘空外遺音絲竹不分山水興約明
日再登臨

柳梢青

西湖後遊

沈進

十二重樓是誰珠箔雙捲銀鈎桃葉春潮楊花暮
雨一段閒愁飛來沙際輕鷗芳草外春風舊遊
團扇歌殘羅衣試罷人在蘭舟

齊天樂

苔南道中

李符

野塘水漫菰城路曉來載酒移檻柳暉汀荒邱遲
宅壞急雨鳴葭千點綠蕪如染映翠藻參差鷓鴣
能占沽酒何邨花明獨樹小橋店昔遊如昨日

耳記深深院宇綺羅春豔粧閣懸蛛舞衫化蝶滿
目繁華都減濕雲乍斂露浮玉遙峯相看無厭漁
唱滄浪荻根燈又閃

柳梢青

和沈山子西湖後遊

李符

前度芳遊裙腰草外綠漾輕舟渡口飛花波心掠
燕人倚紅樓重來緩控嘶騶悄不見疎簾上鉤
一鏡空香雙螺斜照都是春愁

八歸

同周貧谷查聲山集龔蘅圃玉玲瓏閣

李符

門臨水市樓觀海日西風搖落江柳無端泛梗錢
塘路不分仙郎宅裏乍逢良友除却書床拈賦筆
有何事可消清晝只愁對剩水殘山歷歷在簷牖
怪爾輕蓑短棹行歌並發已過秋香時候高峯
南北橫橋十二更問黃花開否把蕉筒檢點明日
還期載尊酒譜新聲須尋綵妓付與檀槽聽伊調
素手

青玉案

送施韓友歸南湖

沈岸登

仙舟幾日臨淮浦
打兩槳平江路
最憶南湖來往處
渡頭楊柳門前烏桕
總是青青樹
藤陰儘好銷炎暑
況有深杯斟綠醕
何事留君君不佳
秋風準擬尊羹菰飯
吾亦全家去

山花子

西泠遊女

沈岸登

繡領鴛鴦刺未工
春吹到柳絲風
誰喚停鍼尋鬪草
斷橋東
裙摺映來新
似月簪
幫試處小於

弓最愛湖邊山一對兩高峯

憶王孫

夜汎鑑湖

朱彝尊

天邊新月兩頭纖鏡裏晴山萬點尖小櫂烏篷不
用簾夜厭厭漸覺微風衣上添

梅花引

蘇小小墓

朱彝尊

小溪澄小橋橫小小墳前松栢聲彩雲停碧雲停
凝想往時香車油壁輕溪流飛徧紅襟烏橋頭
生徧紅心草雪初晴雨初晴寒食落花青驄不忍

行

百字令

富春道中

朱彝尊

柁樓侵曉望樟亭木末霧收川淨誰把錢塘犀弩
射衝落驚濤千頃霸業孫郎高風嚴子畢竟看誰
勝西臺寂寞更何人掃巖磴最愛躑躅花繁畫
眉啼處高下穿紅影十載重來頭已白愁看清江
如鏡沙際鷗鷺門前烏桕引我移家興畧師漁父
結隣儘許相並

滿江紅

錢塘觀潮

朱彝尊

羅刹江空設險有海門雙闕日未午樟亭一望樹
多於髮乍見雲濤銀屋湧俄驚地軸轟雷發箕陰
陽呼吸本天然分吳越遺廟古餘霜雪殘碑在
無年月訝揚波重水後先奇絕齊向屬鏤鋒下死
英魂毅魄難消歇趁高秋白馬素車來同弭節

秋霽

泛舟西湖薄暮坐湖心亭待月

龔翔麟

買酒西冷正蕭蕭雨歇白羽風淨別浦喧禽長堤

無柳六橋空帶煙
暝采菱歌靜劃波又見拏魚艇
但目極南北兩峯斜照亂鴻影
湖心亭子遊屐都歸留與吾曹
夜涼飲謝多情纖阿放彩鴛鴦露
宿不知冷半被朗吟驚乍醒夢梁
堪憶紅葉種滿芳塘月中香遠一
奩秋錦

臺城路

送桃鄉農歸長水

龔翔麟

江城又是經年別
山中疎柳多少院雨梧桐池香
菡萏贏得淒涼懷抱鄉程更杳
縱有夢難尋鴛鴦

湖小水驛西風這番輸爾賦歸早 一繩新雁橫
處霜林飛小騎鞭撲紅棗鴉嘴鋤兒鴨頭艇子屏
當還家詩料柴門閉好怕楚尾勾留雪中纔到老
屋溪南蠟梅應放了

吳山青

湖上遇雨

龔翔麟

南高峯北高峯好在空濛雨色中煙鬟霧鬢重
藕花紅蓼花紅不比當年秋興濃采香何處逢

柳梢青

西湖後遊和沈山子

龔翔麟

十二橋邊紅消燕夜綠漲鶯天楊尾梳風櫻珠捎
雨日上歌船依然鈿翠生煙認亭子湖心扣舷
勸酒僧歸鏡詩壁壞夢憶嬋娟

南鄉子

烏石山房即目

龔翔麟

千縷裊茶煙消受松風一榻前
小雨初收簾試卷
山四面洗出佛頭青萬點

憶秦娥

西溪小築

汪森

城隅嫩柳浮煙色溪橋一帶花遮宅
花遮宅峭寒

風雨最難禁得 半篙新漲沙痕碧
籬根細糝蒼苔迹蒼苔迹春泥藜杖到來吳客

鶯啼序

西湖懷古

黃媛貞

閨秀

蘇堤柳下維畫舸凭欄遠眺歎西陵買斷繁華兩
峯螺黛如掃憶往日香車油壁六橋三竺青蔥好
更桂香荷艷玻璃冷浸霜曉 洪谷興酣北苑意
得叫絕遊仙權但滿眼芻牧樵蘇極懸崖控絕島
徧亭臯桃林歇馬採蓮歌換闌山調撫流波荇藻

漣漪澱紋留照 游魚吹浪飛燕翔空慣聽笙歌
開乘好景晴和淑媚吟賞湖光灝樓開粧鏡舟移
芰浦南屏爽氣排林表羨逋仙笑指梅花老孤山
鶴夢冰雪統漸暖日嘶風驕駟齟盡芳草 湘簾
澄碧綠水揉藍載筆吮墨妙約畧煙嵐疎樹瞻顧
從容擬拾幽蘋白雲膠擾蟬鬢颺絲蟾輝映雪幸
西家尚容衰耄趣稀齡少寄臨風傲斜陽一曲瑤
琴放艇湖心水香月皎

浙江通志卷二百七十八